

**Uunga siunnersuut: Inissiani attartortittakkani ineqarnermut tapiissutit pillugit Inatsisartut inatsisaat nr. xx, xx.xx 2015-imeersoq**

**Kapitali 1**

*Aalajangersakkat nalinginnaasut*

§ 1. Inatsisartut inatsisaat manna malillugu ineqarnermut tapiissutit tunniunneqarsinnaapput inoqutigiinnut inissiani attartortittakkani inissianik attartorneq pillugu Inatsisartut peqqussutaanni pineqartumi najugaqartunut.

§ 2. Inoqutigiittut isigineqarput inersimasut meeqqallu tamarmik inissiami aalajangersimasumik najugallit.

*Imm. 2.* Ineqarnermut tapiissutit tunniunneqassapput inoqutigiit isertitaat akileraaruteqaataasussat tamarmiusut, inigisami meeqqat aalajangersimasumik najugallit amerlassusaat, inigisaq taassumalu pequtsersugaanera tunngavigalugit.

§ 3. Init najugarineqartut najugaqartunut naleqqiullugu ataaseq sinnerlugu amerlaneruppata ineqarnermut tapiissutit tunniunneqarsinnaangillat.

*Imm. 2.* Pissutsit immikkut ittut pissutissaqartippassuk imm. 1-imi aalajangersakkat kommunimit sanioqqunneqarsinnaapput.

§ 4. Ineqarnermut tapiissutit tunniunneqarsinnaapput taamaallaat inissiani attartortittakkani ineqarnermut akiliummut.

*Imm. 2.* Ineqarnermut tapiissutit atuinermi aningaasartuutitut atuinermilu akiliutitut tunniunneqarneq ajorput.

*Imm. 3.* Inissiani attartortittakkani ineqarnermut akiliutit inissianik attartortitsisarneq pillugu inatsisartut peqqussutaanni nassuiarneqarput.

§ 5. Ineqarnermut tapiissutit tunniunneqassapput inoqutigiit tamarmiusut ukiumi akileraarfiusumi kingullermi isertitaat akileraaruteqaataasussat tamarmiusut tunngavigalugit.

*Imm. 2.* Imm. 1 naapertorlugu piffissamit naatsorsuiffiusumit inoqutigiit isertitaat malunnaatilimmik allannguuteqarsimappata, imaluunniit nuuttoqarnera assigisaanilluunniit pisoqarnera pissutigalugit isertitat pillugit paasissutissaqangippat ukiumi ineqarnermut tapiissuteqarfiusumi inoqutigiit akileraaruteqaataasussamik isertitassat naatsorsuutigisaat tunngavigalugit ineqarnermut tapiissutissaq naatsorsorneqassaaq.

§ 6. Ineqarnermut tapiissutit tunniunneqassapput inoqutigiit ukiumut isertitaat akileraaruteqaataasussat § 5-imi maleruaqqusat malillugit naatsorsorneqartut ineqarnermut tapiissutinik pinissamut aningaasanut killiliissutit inorpatigit.

*Imm. 2.* Inoqutigiit aningaasanut killiliissutit inorlugit akileraaruteqaataasussanik isertitallit ineqarnermut akiliutip aalajangersimasumik procentiisa naatsorsornerat namminneq akilissa-vaat.

*Imm. 3.* Imm. 2 malillugu nammineq akiliutissat aalajangersarneqarneranni inoqutigiit meerrartaasa amerlassusaat eqqarsaatigineqassaaq.

*Imm. 4.* Meeqqat inigisami najugaqartut amerlassusaasa allannguutaat pillugit kommunimut nalunaaruteqarnerup kingorna qaammatip tulluuttup aallaqqaataanit ilanngunneqartassapput.

*Imm. 5.* Meeqqat angerlarsimaffimmi najugaqartut qaammatip 18-inik ukioqalerfiup naanera tungaanut ilanngullugit naatsorsuisoqassaaq.

*Imm. 6.* Ukiumoortumik ineqarnermut tapiissutit annerpaaffissaannik aalajangersaanermi inissiap taassumalu pequtsersugaanera ilanngullugit eqqarsaatigineqassapput.

*Imm. 7.* Ukiumoortumik ineqarnermut tapiissutit pillugit aningaasanut killiliissutit, nammineq akiliutissat aamma aningaasat minnerpaaffissaat annerpaaffissaallu pillugit maleruaqqusanik Naalakkersuisut aalajangersaassapput.

## **Kapitali 2**

### *Ineqarnermut tapiissutinik qinnuteqarneq*

**§ 7.** Ineqarnermut tapiissutinik qinnuteqaat kommunimut tunniunneqassaaq.

*Imm. 2.* Qinnuteqartoq pisussaasoq paasissutissanik sunilluunniit ineqarnermut tapiissutit naatsorsorneqarnissaannut pingaaruteqarsinnaasunik tunniussinissamut, taakkununnga ilanngullugit inoqutigiit amerlassusaat, katitigaanerat isertitaallu kiisalu inissiaq taassumalu pequtsersugaanera pillugit paasissutissat, tak. § 2, imm. 2.

**§ 8.** Ineqarnermut tapiissutit qinnuteqaatip tunniunneqarnerata kingorna qaammatip aallaqqaataanit atuutilersumik tunniunneqassapput.

*Imm. 2.* Inissiamut allamut nuunnermi ineqarnermut tapiissutit nutaamik qinnuteqaatigineqassapput.

**§ 9.** Inissiani attartortittakkani ineqarnermut tapiissutit ukiup naatsorsuuteqarfiusup naaneranin ineqarnermullu akiliutip allannguuteqarnerani iluarsiivigineqartassapput.

*Imm. 2.* Inissiaq attartugaq ineqarnermut immikkoortortamut attuumassuteqarpat ukiup ineqarnermut tapiissuteqarfiusup ineqarnermut immikkoortortat ataasiakkaat ukiumoortumik naatsorsuutaat malissavai.

*Imm. 3.* Inissiaq attartugaq ineqarnermut immikkoortortamut attuumassuteqanngippat ukiup ineqarnermut tapiissuteqarfiusup ukioq qaammatisiuteqarfiusoq malissavaa.

*Imm. 4.* Ineqarnermut tapiissutinik pissarsisartut pisussaapput allannguutit suulluunniit ineqarnermut tapiissutit naatsorsorneqarnissaannut pingaaruteqarsinnaasut pillugit kommunimut nalunaaruteqarnissamut, taakkununnga ilanngullugit inoqutigiit amerlassusaat, katitigaanerat, isertitaat, inissiaq taassumalu pequtsersugaanera pillugit paasissutissat, tak. § 7, imm. 2.

*Imm. 5.* Ineqarnermut tapiissutininik pissarsisartup imm. 4-mi paasissutissat pineqartut nassiu-tinngippagit, kommune paasissutissanik pisariaqartunik missingiilluni aalajangersaasinnaa-voq.

**§ 10.** Ukiup ineqarnermut tapiissuteqarfiusup ingerlanerani inoqutigiit isertitaat annertuumik ataavartumillu appariaateqarsimappata, ukiumi ineqarnermut tapiissuteqarfiusumi inoqutigiit isertitassatut akileraaruteqaataasussatut naatsorsuutigisaat tunngavigalugit ineqarnermut tapiissutit naatsorsoqqinneqassapput.

### **Kapitali 3**

#### *Allaffissorneq*

**§ 11.** Ineqarnermut tapiissutit pillugit kommune aalajangiisussaataavoq.

*Imm. 2.* Inissiani attartortittakkani ineqarnermut tapiissutit ukiumoortumik aningaasanut aalajangersimasunut naatsorsorneqassapput, taakku tolvtedeliat attartortup ineqarnerminut akiliuteqarnissaa sioqqullugu qaammatikkaartumik ilanngaatigineqartassapput, taamaalilluni ineqarnermut tapiissutit ineqarnermullu akiliutit nikingassutaat kisimi akiliutigineqassalluni. Ineqarnermut tapiissutit attartortitsisumut toqqaannartumik tunniunneqartassapput.

### **Kapitali 4**

#### *Akilersuineq*

**§ 12.** Kommune aalajangiisaaq ineqarnermut tapiissutit utertillugit akilernerqassasut § 7, imm. 2-mi aamma § 9, imm. 4-mi piumasaaqatigineqartutut inuup paasissutissat saqqummiussimanngippagit, imaluunniit annertuallaamik ineqarnermut tapiissutininik tunineqartarsimappat aamma ilisimaaralugu pisussaanngikkaluarluni ineqarnermut tapiissutininik pissarsisarsimappat.

*Imm. 2.* Utertitsilluni akiliuteqarnissaaq kommunip aalajangiuppagu Kalaallit Nunaanni eqqartuussisarnermik inatsimmi maleruagassat malillugit aningaasat akilersinniarneqassapput.

### **Kapitali 5**

#### *Aningaasalersuineq*

**§ 13.** Peqqussut naapertorlugu ineqarnermut tapiissutinut aningaasartuutit 40%-ii kommunimit aammalu 60%-ii Nunatta Karsianit aningaasartuutigineqassapput.

*Imm. 2.* Naatsorsuutininik saqqummiussisarnissaaq kukkunersuisarnissarlu pillugit malittarissasat Naalakkersuisunit aalajangersarneqassapput.

### **Kapitali 6**

#### *Naammagittaalliuteqarsinnaaneq*

§ 14. Inatsit manna malillugu aalajangiinerit tamarmik Isumaginnittoqarfiup aqunneqarnera aaqquussuusaaneralu pillugit Inatsisartut peqqussutaanni nr. 11, 12. november 2001-imeersumi maleruaqqusat malillugit Isumaginninnermi Naammagittaalliuuteqartarfimmut naammagittaalliuutigineqarsinnaapput.

## **Kapitali 7**

### *Atortuulersitsineq ikaarsaariarnermilu aalajangersakkat*

§ 15. Inatsit una atuutilissaaq ulloq 1. juli 2015.

*Imm. 2.* Inatsisip atuutsinneqalernera sioqqullugu ineqarnermut tapiissutit naatsorsorneqarnerat inatsisip atuutsinneqalerneranit sunnerneqassanngillat.

*Imm. 3.* Tamanna ilutigalugu atorunnaarsinneqarput, Inissiani attartortittakkani ineqarnermut tapiissutit pillugit Inatsisartut peqqussutaat nr. 3, 31. maj 2001-imeersoq, Inissiani attartortittakkani ineqarnermut tapiissutit pillugit Inatsisartut peqqussutaata allangortinneqarneranik Inatsisartut peqqussutaat nr. 13, 12. november 2001-imeersoq, Inissiani attartortittakkani ineqarnermut tapiissutit pillugit inatsisartut peqqussutaata allangortinneqarnera pillugu Inatsisartut peqqussutaat nr. 13, 14. november 2004-meersoq aamma Inissiani attartortittakkani ineqarnermut akiliummut tapiissutit pillugit Inatsisartut peqqussutaata allangortinnissaa pillugu Inatsisartut peqqussutaat nr. 6, 7. maj 2007-imeersoq.

*Imm. 4.* Maleruaqqusat, Ineqarnermut tapiissutit pillugit Inatsisartut peqqussutaat nr. 3, 31. maj 2001-imeersoq tunngavigalugu aalajangersarneqartut atuutiinnassapput, malittarisassanik Inatsisartut inatsisaanni matumani inatsisiniluunniit allani aalajangersakkanik piginnaatitsisunik taarserneqarnissamik atorunnaarsinneqarnissamilluunniit tungaanut.

*Namminersorlutik Oqartussat, ulloq xx.xxx 2015*

Kim Kielsen